

國朝先正事略

國朝先正事畧卷九 名臣

平江李元度次青纂

姚熙之向書事畧

姚公啟聖字熙之一字憂庵浙江會稽人生而倜儻以豪聞少客松江趙太守所午睡大鼾僮僕竊窺之則雕虎也甫冠以諸生遊通州得權知州事杖土豪殺之尋棄官去遊蕭山遇健兒掠二女子行其父隨之哭牽持洶洶公怒奪佩刀殺二健兒縱翁與女子去亡命隸漢軍鑲紅旗

聖祖登極公以布衣上疏請八旗開科遂舉康熙二十一年鄉試第一知香山縣事歲比不登前令坐負課繫獄者七人公嘆曰明

年增吾爲八矣。乃張樂置酒。出七人於獄。痛飲之。爲治裝遣歸。而通牒大府曰。七令名下應追金十七萬。已於某月日收庫訖。大吏疑公巨富。代償帑行善。不知公故寒士。實未辦作何償也。時澳門賊霍侶成猖獗。督撫不能制。公以計擒之。論功當上賞。督撫忌之。反誣公通海。將置之死。公夜見平南王。尙可喜。訴之。可喜疏陳其枉。督撫皆以是自殺。而公亦削官。時年五十矣。居亡何。吳三桂反。尙之信耿精忠。應之。而精忠且約鄭錦同反。錦者成功之子。據臺灣者也。臺灣自古不通中國。明末鄭芝龍居之。順治丙戌降於朝。其子成功不從。率所部據廈門金門二島。己亥大舉窺江甯。敗去。始定臺灣爲巢穴。壬寅成功死。其將

施琅黃梧等來降。錦遁臺灣二島。平及精忠反。乞師於鄭氏。錦亟渡海而西。精忠部將劉國軒等皆附錦。遂取泉州及潮州。次年取漳州。精忠大懼。明年三桂令之信割惠州賂錦。錦復取汀州。勢大振。當是時。

天子命康親王傑書南征。公以家財募兵。率長子儀赴軍前效力。先命其友吳興祚說王。王與語大悅。命攻諸暨。進擊紫狼山。賊破之。又敗賊於楓橋。遂以公權知諸暨縣。又斬賊渠朱得福。招撫數千人。超擢溫處道僉事。精忠以重兵踞石塘。阻我入閩之隘。公偕諸將攻拔之。奪楊梅岡。乘勝取雲和縣。又擒賊將曾養性於溫州。時精忠已爲浙督李公之芳所困。且震於鄭氏汀。

州之逼。會大兵已奪仙霞關。公爲前鋒。乃遣使說之降。精忠猶  
豫。公單騎入其營。說之精忠。饗公公劇飲。健啖。指畫伉爽。精忠  
曰。此李抱眞之流也。必不欺我。遂降。論功。擢福建布政使。精忠  
之降也。諸將多畏罪歸錦。錦乘虛盡取興化邵武。而三桂驍將  
韓大任號小松陰。自吉安突圍出。由贛入汀。將與錦合。公復單  
騎說之降。簡其兵得死士三千。養爲親卒。汀州平。十六年。公復  
使大任說潮州守將劉進忠。進忠亦降賊。棄惠州走。於是邵武  
興化漳泉皆復。公曰。二島未平。未能高枕臥也。十七年。錦大舉  
入犯。公以所部敗之於壁爐。亡何。嗣海澄公黃芳世都督伯穆  
黑林遇賊灣腰。敗副都統胡克邀賊鎮北山。又敗提督段應舉。

自祖山敗奔海澄。劉國軒取平和。遂乘勝圍海澄。於是

天子震怒。將逮督臣郎廷相。諭康親王求可代老王及將軍

以下。合辭薦公。遂總督福建。且命節制諸軍。急援海澄。而以

按察使吳公興祚爲巡撫。助公會海澄。以食盡陷。失官兵三萬

有奇。國軒取漳平。長泰。同安。及南安。惠安。安溪。永春。德化。諸縣。

圍泉州。號稱十萬。公分兵救泉。密疏陳方略。

上降書褒勞。且諭閣臣曰。閩督今得人。賊且平矣。公令平

南。將軍領塔爾圖兵抄其饗道。復漳平。總兵林賢等敗賊水軍於

定海。國軒乃解泉州圍。併力攻漳州。大會二十八鎮兵。爲十九

營。與大軍決戰於龍虎蜈蚣二山間。時漳城兵止八千。公五

檄泉州兵不至諸將欲棄城走精忠悔其降大勳公曰賊恃勝而驕謂我不能軍也請不戰以解之而出奇以破之平海在此役矣命閉城門韜弓臥鼓一日天大霧公吹簫築者三壯士鍾寶張黑子等突出持長矛先登前軍接戰不利公自率精兵繼之賴塔以後軍夾擊國軒敗前軍還攻之自辰至酉連破十六營斬其將鄭英劉正璽吳潛等生擒千二百有奇斬首數萬溺死者萬計國軒溺水奔海澄公復長泰同安進攻海澄海澄者濱海地也峻而險賊築塹高數丈排列艨艟與廈門金門海壇相首尾堅不可猝拔乃請復設水師提督開修來館於漳州凡言自鄭氏來者皆盛供帳金帛恣所求卽亡去不問謀至不殺

且厚歛之。謀反以情告戰有日。或填館舍飭供具。大書某鎮某官公館。聲言某月日某將當來降賊。以此互猜。甚且疑而相殺。十八年三桂死。錦五鎮大將黃靖廖瑛賴祖金福廖興各以所部降鄭奇烈林翰等。繼之鄭氏勢益孤。公簡降卒爲水師。驟增二萬人。乃令巡撫吳公與水師提督萬正色進攻二島。明年正月賊將朱天貴以戈船降。遂復海壇。公待天貴厚。竟用其兵。盡破十九寨。國軒棄海澄入廈門。復棄金廈歸臺灣。閩疆既定。吏兵部列上公功。應加者四百餘級。

聖祖晉公太子少保兵部尙書。世襲輕車都尉。公子儀授總兵。世襲騎都尉。先是濱海居民輸賦外。又私餉成功。以求免劫掠。



當事遂定沿海之界而內遷其民越者死民多蕩析離居滿兵復奴其老稚箠楚不忍聞公任總督力與驕兵悍將相持屢奏禁兵不服水土宜撤歸又奏康王體尊不宜久暴露宜先頒師疏三上天子許可兵歸者猶驅子女北行公涕泣啟王令軍中敢私攜良民者死而私傾家財贖之凡捐金二十萬兩贖難民二萬餘人又請開海界復民業聽降卒墾荒兼收魚鹽蜃蛤利而分屯列戍以衛之詔遣侍郎某來勸不敢主議公力任之乃報可閩人皆肖像祀焉方施琅之內附也

世祖用爲水師提督成功死施頤以平臺自任旣而不克或疑其貳召入京不復用公爲布政使嘗疏薦之不報至是請改

正色陸路仍以水師任施且曰臣願以百口保琅又奏募餉死  
子少國內亂時不可失

聖祖乃遣琅與公同進兵琅至密疏請以公駐廈門而獨任進  
師時公已出海見疏不懌自陳請行詔公還廈門二十一年  
夏施公請乘南風攻澎湖公欲待北風直趨臺灣彼此見不合  
師不果出明年六月施公竟以師行會颶風與潮俱發前鋒爲  
急流飄散國軒以精兵二萬出牛心灣別將出雞籠嶼夾攻矢  
集施公目幾失利忽天雨颶風止公所約賊將呂韜等開使適  
至施復進澎湖翼日大戰朱天貴先進水驟長一丈舟並行如  
鳥張翼而上國軒掀案起哭曰天也夫何言遂自吼門遁臺灣

初鄭克塽有降意而僞行人傳。霖反復爲奸。公以計去之。又遣漳浦黃性震招國軒。曾密報書未遽降也。至是性震故洩之。主臣互相猜。衆莫爲用。大兵遂自鹿耳門入。八月癸亥。克塽以臺灣降。自康熙十三年用兵至二十二年。福建平時北風正利。施由海道。奏捷七日。抵京師。公由驛馳報。後施二日。

聖祖得施疏大喜。策勳在平瀆諸將上。封施公靖海侯。將以次及公。公自陳無功。乃召掌中樞。是年十有一月。疽發背。薨年六十。論者謂戰功雖首。施公然實。公所疏薦。至平日運籌設問。攻賊心。公之力。无獨多云。公身長七尺。廣頰修髯。目閃閃如星。下電手。勒奔馬。用弓至二十石。麾下所養奇才劍客皆能得。

死力臨陣應變如神而性慈不妄殺戮生平慷慨仗義揮金如泥沙尤恤文人各屬皆置學田培寒畯喪歸軍民哭送者數萬當芝龍起事時廈門有石文云生女滅難十億相倚解者謂十億兆也加女姚也鄭從西雞也滅難滅鄭也鄭氏初踞海上公始生傳四世六十年而爲公滅公平廈門之歲卽病疽召鼓山異僧治之曰天生公以靖閩疆也今事尙有待疾不足憂果應手愈臺灣旣定疽復發曰全閩底定公疾不可爲矣夫人何氏絕有力不第能舉曰公奇之娶焉是生長子儀雄偉與公埒嘗驅駟馬駕奔車自後掣之馬前卻不自由挽强弓百步外可洞四札每戰閩人望見前鋒曰此姚公子旗也以功授知縣擢刑

部郎出知開封府。詔以京堂用。自請效力從戎。改總兵。終雲南鶴慶總兵官。公所著有憂畏軒遺集。

宋牧仲尙書事畧 子至

宋公名犖字牧仲號漫堂河南商邱人大學士文康公權子也少從賈靜子侯朝宗遊立雪園六子社順治四年公年十四應詔以大臣子弟列侍衛考試優等康熙三年授黃州通判十六年補理藩院判遷員外郎出榷贛關遷郎中二十二年授通永道二十六年擢山東按察使尋遷江蘇布政使明年擢江西巡撫會湖廣裁缺兵夏逢龍作亂陷二十餘城羽檄日四五至人心惶惑公行抵彭澤適江西兵調赴湖廣剿叛卒次九江以乏餉譚公檄發湖口縣庫銀千兩遣官賞給眾兵乃前進及抵南昌甫數日舊裁督標兵李美忤袁大相等煽誘三千餘人謀劫

倉庫與夏逢龍合。有上變者。公佯不省。而陰授游擊趙永吉。方  
畧。卽夜縛二渠魁。鞠實斬。以徇。餘黨悉不問。四境帖然。於是條  
列病民者十數事。先奏除之。然後緩征弛力。通商惠工。除  
興學校。政以大成。會甯州宜春等十二州縣旱災。疏請蠲緩。又  
言各省罪囚。俱有支給口糧之例。其起解囚徒。應按每日五十  
里爲一程。每名日給升米。於常平倉支給。又言近奉諭旨。每  
歲終。令巡撫察盤藩庫。法至善也。其糧驛二道庫。請於每年奏  
銷及離任日。令藩司察盤。至府庫宜責成。道員察盤。可永杜虧  
挪弊。又言近來漢軍外官解任。裁缺者。并其家口。槩催歸旗。旣  
立限期。復取經過地方官結狀。逐程遞至。竟與罪犯無殊。請免

遞諸䟽並下部議行三十一年調江蘇巡撫去之日萬姓遮  
雨泣及攝任疏報江甯府屬之上元六合句容松江屬之上海  
鎮江屬之丹徒因山水陡發成災又䟽報淮陽徐三屬二十餘  
州縣水災其田畝被淹者請破格全蠲額賦並請截漕米十萬  
石移江甯倉米三十萬石鳳陽倉麥六萬六千石分途散賑並  
得旨俞行前後賑饑民五百萬有奇

上嘗垂問閣臣以各直省巡撫賢否大學士伊桑阿奏宋犖清  
廉爲天下巡撫最

上曰朕久知之三十八年春

聖祖南巡至蘇州賜御衣冠及御書懷抱清朗額又賜



額曰仁惠誠民公進所刻綿津詩集

上尋諭近臣曰居官如大學士吳璵總督張鵬翮巡撫宋犖朕  
可以無憂四十二年春

上再南巡諭嘉公居官安靜和平深得大臣之體公面奏云  
昔宋臣范成大蒙宋孝宗賜石湖二字後世傳爲美談在孝宗  
不過南渡偏安之主我

皇上乃堯舜之君相去霄壤臣功業雖不及成大然遭逢之盛  
不啻過之臣家有別業在城西陂乞賜書西陂二字

上領之時諸臣競進求書公奏曰臣老矣以齒當先賜臣  
上大笑走筆作西陂二大字賜公少選命侍衛取入重書

以賜。又別賜御書八種。回鑾復賜書額曰清德堂。

賜聯曰官箴三命懷家學一經傳。四十四年夏。

上駐蹕蘇州。賜福壽二大字。題云江甯巡撫宋犖年逾古稀。

步履壯健。故特書以賜之。又賜額曰魚麥堂。賜聯曰兒

孫歌舞詩書內鄉黨優游禮讓中。又允公請。御書世有令

儀四字。額其家祠。瀕行復賜聯曰地聯江海屏藩重。賦甲東

南節鉞雄。公以老乞休。溫詔不許。是年冬。命公子庶吉士

至。偕御醫馳驛往視疾。賜人蔭三斤。公在江蘇三值。巡方

召對皆稱旨。溫諭移時。寵賚至不可勝數。嘗諭閣臣曰。

江蘇繁劇之區。五方雜處。相安無事。皆巡撫犖坐鎮之功也。先

是公請豁吳縣太湖旁埝地千七十餘畝。額糧百八石。銀百八十兩有奇。部議令再詳察。至是復力請。特旨豁除。尋疏言蘇松常鎮四郡州縣所徵錢糧。有完及九分以上。因接徵前任舊欠未完被議者。請改降調爲降畱。部議不可。特命九卿再議從之。是年十一月內遷吏部尚書。遇會議輒侃侃持正。四十七年以衰老乞罷。優詔許之。將行。賜御製詩有句云。久任封疆事。蘇臺淨點塵。五十三年春入京祝。

聖壽。召對數次。欸語如家人父子。賜宴日。

上命諸臣八十以上者至。御榻前各親賜酒一杯。時受

賜者六人。公居首。詔加太子少師。賜詩有世家耆德自天。

全之句。九月薨於里第。年八十。遺疏聞得。旨。宋學才。是。優。長。勤勞夙著。宣力年久。敬慎自持。下所司議卹。賜祭葬如例。公在官能持大體。以清節見推。兩淮鹽商歲餽萬餘金。公皆謝卻。尤具人倫鑒。三河令彭公鵬治行爲畿輔最。公官通永時。力薦諸巡撫于清端。公得超擢。撫吳時。復面奏其賢。請補江蘇布政使。卒爲名臣。陳恪勤公鵬年。由山陽令擢海州牧。公器之。凡陳民所不便與已所欲爲者。許不拘常格。

上嘗面問陳鵬年居官何若。公力稱其賢。自公去後。恪勤乃屢爲大吏所訾矣。公雖以任子入官。不由科目。而淹通典籍。且練習掌故。詩文皆爲當代所推。少時嘗繪蘇文忠公像。貌已侍側。

及筮仕。竟得黃州官部。曹時與龔芝麓。孫北海。吳梅村。熊次侯。王漁洋。宋荔裳。計改亭。陳其年。尤西堂。朱竹垞。相唱和。列十子詩選中。又嘗選江左十五子詩。及三家文鈔。以提唱風雅。三家者。侯氏方域。魏氏禧。汪氏琬。十五子者。王氏式丹。吳氏廷楨。宮氏鴻歷。徐氏昂發。錢氏名世。張氏大受。楊氏掄。吳氏士玉。顧氏嗣立。李氏必恆。蔣氏廷錫。繆氏沅。王氏圖炳。徐氏永宣。郭氏元釭也。公名亞於漁洋。尙書有漁洋綿津合刻詩。吳中邵長蘅與公爲布衣交。客公所最久。以文史相切劘。施元之蘇詩註。久無傳本。公得殘帙。爲讐補刊行之。其宗法可想見已。著有西陂類稿。筠廊偶筆。共四十六卷。子至。字山言。有學行。癸未進士。由庶

吉士入武英殿纂修佩文韻府授編修辛卯主貴州鄉試壬辰授浙江提學道著有緯簫堂詩集筠官檢討致官四川布政使

陸清獻公事畧

陸公隴其字稼書浙江平湖人六世祖溥官豐城縣丞嘗督運  
夜過采石舟漏勢危甚跪祝天曰舟中一錢非法者願葬魚腹  
漏忽止旦視之則水荇裹三魚塞之始遷居泖上築堂曰三魚  
公文集稱三魚堂者以此公少貧力學以聖賢自勵非義不取  
嘗授徒嘉善有李氏欲延之公曰固願往但館穀不可有加庶  
有以謝主人康熙九年庚戌成進士廷對極論時務其畧曰法  
者治之迹而非所恃以爲治也爲治而專恃法自古及今未有  
能治者臣非欲

陛下廢法而治也竊以爲法之及人也淺德之及人也深法之

禁人也難。教之禁人也易。今日之治。苟非崇德教以正人心。雖日議法無益矣。伏願

陛下日新其德。以堯舜禹湯文武之心爲心。以堯舜禹湯文武之學爲學。有弗言。言則必使天下共法也。有弗動。動則必使天下共則也。於是務敦教化。一如古者司徒黨正三物六行之制。盡其實。勿徒徇其名。天下之人。旣動於上之德。而又習於其教。則自然相漸。以仁義相尙。以忠厚相勸。以正直不待法之驅。而人皆有君子長者之風。由是立法以興利。莫不安於上之所興。立法以去弊。莫不安於上之所去。使不先正人心而徒恃區區之法。議法者日益精。而立法者日益巧。法之弊未有已也。雖然。



臣猶有進焉。人之相遁於法也。始於其心之不正。亦由於用之不足。書曰。凡厥正人。既富方穀。管子曰。衣食足而禮義生。今之大吏祿薄不足充其費。則思借法以自肥。小吏俸微不能養其家。則思干法以爲姦。其罪可誅。而其情可憫。是在

陛下仿古待臣之禮。稍重其祿。使有以自給。而又定其車輿服飾之制。宮室飲食之節。勿使耗於無用。夫既有以養之。又無以耗之。則皆充然有餘。自然奉公守法。竭心力以效忠於上。然後德教行。人心正。而邇治可復也。由二甲用知縣需次歸。益肆力程朱之學。乙卯知嘉定縣。嘉定賦多而俗侈。公以清介自持。上官嚴憚之。往時令餽遺上官。動千百計。公歲時起居通書問。而

已。有大賈汪姓。橫行里中。里人患苦之。數以利啗令長。至是餽千金。公弗內。則求公故人爲之游說。公與故人談讌極歡。察其言涉汪事。卽變色。易容。竟不得申其說。會汪僕占賣薪者妻。被訴匿汪所。公捕治如法。汪以是膽落折節。改悔爲善。人民有宗族爭者。令族長逮之。鄉里爭者。令里長逮之。又有自追牌則兩造要而來不煩吏也。衙胥舊以千數。至是去者過半。其在者無所得食。公令更番給事。退則爲耕販以自活。有所遺攝計日與錢。遠者許就民間一飯。括索者必痛懲之。尤務以德化民。不事刑威。民告其子不孝。訊得實。公涕泣自訟曰。吾德薄不能宣教化。令汝父子至此。因委曲誠諭。父子皆大哭去。子歸卒善事其

父有弟以盜訟其兄。公廉知其弟婦翁所導也。杖而數之曰：爲子婿計，乃忍斷其手足耶？兄弟皆感泣。好如初。邑多逋賦，公立甘限法，令應輸者自爲限。屆期，輸半卽免杖。一士人經月無所輸，公曰：是非故逋賦者。察之，則新遭憂也。卒不追呼，而糧辦。舊有行杖錢，月數千緡。自公不事敲扑，而正供外，民不費一錢矣。其餘雜派悉除之，民得休養。益輸將，惟恐後。時南方用兵，徵餉十萬，公爲文諭民，激以大義，不一月而數足。公生日老，稚數千拜堂下。有百歲老人求一識，公曰：自民有知識以來，未見有官如爺者也。丙辰，廷議暫抽市肆錢一年佐餉，例不及巷舍。公如例報徵，巡撫慕天顏不悅，疏言：時方多事，陸令非應變才，請調

簡部議遂引材力不及例。鐫三級調用。嘉定民大賊罷市。日號巡撫門乞畱。巡撫不自安。再具疏請復。而公以盜案落職矣。盜案者。邑張某與汪姓訐訟。汪赴理。夜被盜殺其弟。以讎殺告。公疑小隙無殺理。牒大府請俟獲犯定擬。尋獲真盜七。獄具。部議以初報不直指爲盜。疑諱匿。引例奪職。或謂公盍辨諸。公曰。縣有盜。長吏不知。黜宜也。何辨爲。士民相率詣大府爲辯。卒莫省。鄉民扶老攜幼。獻薪粟。涕泣請受。公悉慰遣之。比行。委巷結綵。炳香以送。建生祠。尸祝之。或刻木爲位。旌幢鼓吹迎歸。以祀者。日數輩。凡兩月乃已。卽嘗所懲艾者。咸謂有再過恩。亦不自知涕泗之何從也。會徵博學鴻儒。工部主事吳元起以理學純深。

文行無愧薦公未及試奔父喪歸終喪不飲酒不食肉不入內  
寢服除牒部請改教官弗許魏總憲象樞抗章訟公冤再疏舉  
廉吏十人公其一也有旨復原官癸亥授靈壽知縣縣於道  
定最爲磽瘠俗強悍善鬪輕生公勸課耕耨以盡地力請於上  
官與鄰縣更役以蘇民困革火耗絕私派以養民財又反覆曉  
譬化鬪狠輕生之習其爲民厚生正德若謀其子弟也尤申明  
鄉約保伍之制舉鄉飲酒禮朔望詣學宮與諸生講論導以躬  
行著松陽講義諄諄於義利邪正之辨會歲饑公牒大吏以聞  
得旨免徵額賦有大姓爲盜劫巡撫不欲奏聞命改爲竊公  
不從曰甯以誠去官不欲以僞苟祿知府乃取盜魁杖殺之公

惻然曰。盜可殺而殺之。不以法。吾不忍也。作勸盜文。遣吏往獄中。爲諸囚誦說之。聞者多痛哭。越三年。復大饑。詔發三千金。以賑公徧歷山谷。親審其戶口。府檄發限單。不許逾額。公不卒盡散之所全活者多。巡撫文清公格爾古德特疏薦公下議敘。嘗以公事至都門。政府欲一見之。接浙行。卽魏敏果屢薦公於朝。亦不往謁。甲子夏。兩江總督于清端公薨。

上臨朝痛悼。問九卿詹事科道。今天下清廉官如于成龍者有幾。於是廷臣以直隸巡撫格爾古德。部郎范承勳。蘇赫。江南學道趙崙。揚州知府崔華。兗州知府張鵬翮。靈壽知縣陸隴其對。丙寅。巡撫于襄勤成龍訪民間利病。公陳六事。一正月開倉太。

急宜緩。一開荒起科爲限宜寬。一水利宜興。一積穀宜廣。一州縣存畱公使錢宜復。一審丁溢額宜裁。大畧謂自古稅斂必俟稼穡登場。今正月開征。民間尙未播種也。且四方安謐。司農不至告匱。自可以前歲所餘暫抵本年春夏之餉。俟秋成徵補於國賦。無損而民力則可以大紓。唐虞三代之政。此其首務也。餘五事皆切中時弊。于公疏薦公爲大學士。余國柱所阻。庚午科道員闕。

上面諭在廷各舉所知。於是工部尙書張公英。左都御史陳公廷敬。兵部侍郎李公光。地禮部侍郎王公澤宏。交口論薦。與清苑知縣邵嗣堯。三河知縣彭鵬並舉。遂奉 俞旨行取。公念靈

壽頻年災正供不支而雜徭未盡減將受代乃申請緩征量減房地稅又言上官供應久奉裁宜永革除又請將倉庫不時借放饑民于公報曰謝事時猶力爲災黎請命仁人哉臨行邑民哭送者數萬立碑志遺愛如去嘉定時是年秋補四川道試監察御史疏請將畿輔災區錢糧悉蠲免勿帶徵特旨允行未幾湖廣總督丁思孔請令偏沅巡撫于養志在任守制舉朝頗右之公䟽言天下當承平之時湖南非用兵之地若因督臣請而畱後將爲例其不奪情者鮮矣臣不知議者以養志爲何如人其非賢者耶則固不當使之在任守制其誠賢耶則固不肯在任守制矣䟽入養志遂解任辛未夏大旱遵旨陳言一請



豁免直隸被災帶征各錢糧一言直隸編審人丁宜求均平一  
請停捐免保舉之法謂捐納州縣賢否錯雜故立保舉法以防  
之近并保舉亦得捐納則賢否全無可憑且保舉所重在清廉  
以有清廉字樣爲合例保舉可捐免則是清廉之目可納貲得  
也竊以爲不但保舉之捐納宜急停而保舉之限期更當酌定  
請 敕部察捐納之員凡到任三年而無保舉者卽開缺休致  
庶吏治可以澄清時御史陳某請停保舉而開先用之例公再  
疏言捐納先用大抵皆奔競躁進者也故多一先用之人卽多  
一害民之人又申三年開缺之請詞加激切及奉 命會議公  
持前議益堅謂捐納一途惟恃保舉以防其弊今併此而捐之

且待次年三月停止。此輩有不捐納者乎。澄敘官方之典。蕩然掃地矣。議者或以三年無保舉。卽令休致。爲太刻。夫以貲得官。踞於民上者三年。亦已甚矣。又不能發憤自勵。其貽害於民可知。况休致歸。仍在薦紳之列。爲榮多矣。卽云設立期限。反生營求。此在督撫不賢。則誠有之。臣不敢謂天下必無賢督撫也。時大兵餽餉。亟計臣方恃捐納濟國用。而豪右希進者。相率慶彈冠。內外諸臣亦多由捐納進。公獨於疏議中痛斥之。衆大譁。部議以公拘資格。致捐納觀望。誤軍需。負言官職。擬削籍。謫奉天安。置庶吉士。張梈嘗欲從公受學。未果。至是恐遽失之。卽日執貲爲弟子。而順天尹衛公旣齊。巡畿輔。還入對。言民心惶惶。惟

恐陸御史遠謫

上特宥公俾還職尋命巡視北城公凡有獻納必齋宿竭誠上每聽其言以爲與朕意合故雖以議捐納事府眾怨而聖明終鑒其誠也是年秋以試俸滿都察院注公不稱職應外調遂移疾歸足跡不一至城市茅屋數椽布衣蔬食益以明道覺世爲已任壬申館虞山席氏歲暮還家感末疾卒年六十有三時康熙三十一年十二月十七日也後二年江南學政許汝霖任滿

上曰原任御史陸隴其學問優長操守清潔可代其任大臣奏公已故

上嗟嘆久之曰。本朝如此等人。不可多得矣。乃以直隸守道邵嗣堯代之。公尋祀直隸江南名宦。浙江鄉賢。雍正二年。臨雍釋奠。命增從祀賢儒。禮部尙書張公伯行。請以公入祀。制曰。可。乾隆元年。特賜諡曰清獻。並加贈內閣學士兼禮部侍郎銜。公教人必授以朱子小學及程氏讀書分年日程。俾學者循序致功。其學以居敬窮理爲主。謂窮理而不居敬。則玩物喪志。而失於支離。居敬而不窮理。則將掃見聞空善惡。其不至師心自用。墮於佛老者。幾希。所著學術辨力闢陽明爲禪學。謂陽明之病在認心爲性。顧涇陽高景逸之病在忘動求靜。論者謂程朱之統自明薛敬軒胡敬齋後。惟公能得其正宗云。公所著

有四書大全困勉錄續錄松陽講義古文尙書考讀書志疑讀  
禮志疑禮經會元戰國策去毒呻吟語質疑衛濱日鈔問學錄  
靈壽縣志三魚堂文集其門人曰王前席趙裳旂席永恂侯開  
國

趙恭毅公事畧弟申季 子熊詔

公諱申喬字慎旃一字松伍江南武進人父繼鼎明進士官兵部主事公生之日紅光滿室中康熙九年成進士需次歸資授徒以養得金未嘗啟封輒以奉父母嘗遠出忽心動卜諸神不吉疾馳歸而父已得疾尋丁憂二十年授商邱知縣在官刻苦自厲案牘悉手治每中夜不寐日出視事無畱獄有投牒者一識面數年不忘釐畝稅戶給照單書四至隱占者許自首荒者除之歲饑捐俸爲粥食餓人不足括縑數匹易米以濟鄰縣民踵至嘆曰使吾縣得此好官吾煩遠涉耶命諸生舉窮鄉嫠婦爲請旌樹坊過之必下輿拜二十五年行取入京授刑部主事

遇事疆直。會湖廣有獄。失入引律。駁還得減死。三十三年。遷員外郎。引疾歸。四十年。以安溪李公薦。特旨召見。授浙江布政使。及。陛辭。溫諭有加。公受事三日。首革南糧布袋之弊。故事。發兵糧石。給口袋錢四十。歲費銀四千兩。悉徵之民間。至是。照京倉例。營兵自備口袋。弊遂絕。調欲使州縣無虧帑。當先革藩司陋規。凡錢糧加平時節餽送兵餉。掛發奏銷部費。諸欸一禁革。僚屬斂手奉法。外營兵餉。舊解府撥發。公令歸本州縣支給。省費不訾。在官常自家運米以食。曰。吾不欲以口食累民也。四十一年。擢浙江巡撫。賜御書。藩庫有羨銀二千兩。封識以授代者。曰。吾前奏銷不費一文錢。後將難繼。得此足辦一歲。

事矣。勿更擾民也。自藩署移撫。屏襪被一肩書。數簏而已。尋奏築錢塘江口隄。易海塘土以石。將施工。齋戒三日。率屬赴江干。爲文以祭。忽風狂潮大至。浪搏人若弩。注觀者奔辟。公朝服屹立不動。潮遽止。公跪禱。願假數旬以畢事。嗣是潮不至者七旬。而塘成已。而塘外擁沙成洲。可數里。自是潮不爲害。又請修葺禹陵。增鄉試中額。並從之。九月。湖南鎮筸士民叩闕言紅苗反。給事中宋駿業因劾總督郭琇。巡撫金璽。提督林本植。衰廢。上命公往湖南。會同侍郎傅繼祖等察勘。遂調偏沅巡撫。四十二年秋。疏請征紅苗。爲先撫後剿之計。

上命粵黔楚三省提督會同湖廣督撫進剿。十二月。白龍椒洞。



分路進剿。斬馘千餘。降集寨三百有奇。紅苗平。移辰沅道駐鎮其地。尋諭曰。近征紅苗。貴州提督李芳述親冒礮石力戰。連斫數寨。聞趙申喬亦甚強毅也。先是

上南巡。公劾蘇州行在。賜御書督撫箴。及綏輯撫安四字。

上以湖南道遠。而官吏私征加耗倍他省。特頒諭旨申飭。公還建亭勒詔書。檄告屬吏。且言澄源端本。必自巡撫始。若稍有不法。爾官民等卽共聲其罪。於是屬吏惴恐。禁革一切私派。定頒漕米斗斛。官爲收解。驛傳夫馬銀。於本州縣坐支。又革鹽商規例。酌道里遠近平鹽價。請以上年兵米所餘。畱抵春夏餉有餘。乃折銀解部。永停預徵之令。州縣列上貞節婦有逾月具

請者即按懲胥吏復請准舊例給建坊銀葺古賢祠奪還侵地  
見屬吏必齟齬使得盡言利弊惟嫉惡如仇不少貸疏劾巴陵  
知縣李可昌等舉賢能吏楊宗仁伍士琪張仕可王朝恩尤加  
意文教遇學道必以清慎相勸袁學道者試常德縱衙胥攬賄  
公覆試諸生黜荒謬者十七卷劾罷學道四十五年疏言清浪  
平溪二衛僻處山隅請改征本色爲條銀以免運費又言湖廣  
教職選缺遠者輒數千里請就湖南北分省選授均下部議行  
四十六年饑發倉平糶明年

聖祖復南巡公迎謁淮浦賞賚有加遂奉旨赴荊州勘同  
知王侃等侵蝕木稅事鞫實論罪疏請裁港口渡私稅其荆關

三  
稅務仍歸部差管理。又請以靖州屬鷓鴣關稅併入辰關征解。以杜侵漁。均從之。是年湖南復饑。不待奏。平糴如前。布政使董昭祚受商人賄。出諭令米船南下。價益踊。已聞親喪。復屬人爲保留。公案問得實。劾罷之。會南岳廟成。內閣學士宋大業奉詔贊。御書題額往還。劾公不敬。及諸溺職狀。且爲昭祚訟冤。疏下。公回奏。公因發大業前後恐喝婪金狀。詔黜大業。追金入官。明年疏劾提督俞益謨。冒抽兵餉。致營伍空缺。益謨亦劾公苛刻。命尙書蕭永藻赴楚察審。諭閣臣曰。自趙申喬參俞益謨。武弁始知敬畏。今天下兵額缺而空名食糧者多。所關非細故也。永藻尋以劾疏皆實回奏。

上命益謨休致而公還職十二月召授左都御史尋諭曰趙  
申喬撫偏沅時甚清廉但負氣人皆畏其口直與俞益謨互訐  
彼時亦有以申喬爲非者朕細加察訪公論乃彰清官固所當  
惜其言偉不可行朕亦不從惟言雖未當而並無私見且能實  
心任事者朕必加護惜焉公之去湖南也士民夾道焚香號哭  
自長沙至岳州數百里送者不絕各屬多建生祠祀之入都疏  
言河南瀕河荒稅宜豁且請敕撫臣凡河水衝決及浚河築  
堤所占民田皆除其稅籍五十年典順天鄉試疏劾編修戴名  
世所著南山集子遺錄有大逆語下刑部鞠實正法又疏言直  
省寺廟眾多易藏奸請勅禁增建從之五十一年典會試疏

請禁營兵預名食糧以清虛伍。又言奉 旨普免各省地丁錢糧。惟潼關衛大同府征改本色不列蠲例。請援奉天臺灣例一體蠲免。並 允所請行。五十二年春。

萬壽禮成。公疏請建儲固 國本。尋 命赴廣東平糶。因奏改電白縣解運瓊州等府兵米。仍征折色。免涉海洋之險。及回京。奏潮州知府張應詔清廉。

上卽擢爲兩淮運使。是歲公七十。御書匪懈堂三字以賜。十月。遷戶部尚書。商人馬維屏呈請納銀萬兩交部。領大錢。易小錢。送局改鑄。下內務府戶部會議。將許之。公言。收換小錢。有司賤也。商人圖利。恐藉端擾民。請勿許。特旨允之。公在部。矻矻。

治文書句稽錢穀無甯晷事關大體多與同官異議以是不悅於眾五十四年山西巡撫蘇克濟疏劾太原知府趙鳳詔受賍三十餘萬請革職究擬公以不能教子致鳳詔居官不肖求賜罷斥得旨朕禮遇大臣甚優自始至終無不期其保全今聞趙申喬奏詞意忿激殊失大臣體著嚴飭仍令在任供職鳳詔尋伏法五十六年戶部奏銷鼓鑄錯謬公革職畱任明年充會試副考官五十九年夏以衰疾乞休優詔復原職令在任調理其應賠之項從寬免追十一月薨於位年七十有七賜祭葬如典禮諡恭毅公生平清介剛直不可以私干論學以不欺爲本爲政嚴厲發奸摘伏如神名重天下而楚人尤稱頌之當

吳三桂據衡州時。民苦征役。公至。始大減火耗。免徭役。一切無  
藝之征。悉罷。民困獲蘇。雖婦人童孺。無不知有趙撫院者。百數  
十年來。未之或衰也。公於案牘。皆手治。在湖南時。士民有竇政  
錄之刻。書吏何祖柱。復手鈔公奏疏文告彙爲二十卷。又補輯  
其泚浙及入臺總部時各稿。爲四卷附焉。官戶部時。優人徐采。  
給事潘邸。嗾傭者役人事下九卿。議僉欲寬采。以傭抵公。據刑  
部讞論。采主使。應坐絞。已而采竟減死戍邊。及

憲皇帝卽位下。詔褒公。仍逮采於邊。論如律。又以公與故大  
學士阿蘭泰等。並宣力效忠。追贈太子太保。其應分賠屬員虧  
帑銀。特旨寬免。雍正八年。詔入祀賢良祠。尋祀湖南浙江。

商邱名宦公嘗言官清非僅不名一錢也。須兼廉明二義。廉者一塵不染。明者一毫不蔽。兼之斯可謂清。若惟一介不取而處事糊塗。人將安賴。吾自信差免糊塗而已。

世宗嘗與近臣追論異時名卿。較其才守。互有軒輊。惟於公無間焉。弟申季字行瞻。丁丑進士。任遷江令。革除科派。禁獍豸劫掠。及豪強債利。舉卓異。改授編修。異數也。督山東學政。廉慎自矢。評文不假手幕友。以勞疾卒。官長子熊詔。字侯赤。康熙己丑一甲一名進士。賜及第。授修撰。入直南書房。因同官訐奏記注事落職。仍畱供奉。戊戌以大臣子弟從軍肅州。出私財濟運。父憂歸。未卅月以毀卒。有詔復職。所著述多爲時所稱。



張文端公事畧

張公鵬翮字運青四川遂甯籍湖廣麻城人康熙九年進士選庶吉士改刑部主事遷禮部郎中十四年分校順天鄉試明年分校禮部試十九年出知蘇州府母憂歸服闋補兗州府有廉幹聲今兗州府志其手編也二十四年遷河東鹽運使明年遷通政司參議轉督捕理事官二十七年俄羅斯察罕擾邊我兵困之於雅克薩城悔罪乞恩公奉使同內大臣索額圖等往定界還朝

聖祖器其能擢大理少卿明年巡撫浙江清漕弊覈鹽課請建定海縣城池賑餘姚上虞嵗臨海太平等縣災疏禁商船出洋

私帶軍械。又因浙省旱災。請將三十三年輪蠲之漕糧。於三十二年免征。皆得。旨俞允。尋召爲兵部侍郎。提督江南學政。三十六年。遷左都御史。疏陳淮陽所屬六州縣水災。巡撫宋榮未聲明拯救之策。應請特賑。允之。明年。遷刑部尚書。未幾。授兩江總督。三十八年。

上南巡。閱視河工。畢。命扈蹕入京。賜朝服鞍馬弓矢。先是。公偕尚書傅喇塔。察審陝西侵蝕貧民籽粒銀一案。旣覆奏。上諭閣臣曰。傅喇塔畏人懷怨。草率具覆。張鵬翮亦稍模稜。至是。命復偕傅尚書赴陝西詳審。並鞠前陝撫布喀控前陝督吳赫侵帑。及吳赫與甯夏道吳秉謙互訐等獄。分別論如律。明

年正月回京

上問各督撫居官狀。公奏對稱。旨諭閣臣曰。張鵬翮往陝西。朕畱心察訪。果一介不取天下廉吏無出其右者矣。三月。調河道總督。疏請撤協理河務徐廷璽。以專總河之任。撤河工隨帶人員。以免糜帑。並請敕工部毋以不應查駁事從中阻撓。均從之。尋疏請將攔黃壩。照上流河面折挑。使一律寬深。亟堵馬家港。使水勢不至旁洩。又言清口爲淮黃交匯處。淤成平陸。應於張福口開引河。引清流水入運。使之暢達。庶可敵黃。又言芒稻河兩岸過狹。宜濬使暢流。另建芒稻閘。以禦江湖。又鳳凰橋引河及雙橋灣頭二河。均宜加濬。疏皆下部議行。功成。

上易攔黃壩名曰大通口。諭閣臣曰。前張鵬翮赴任時。朕卽指示。謂必毀攔黃壩。挑濬芒稻諸河。今次第興修。觀其奏牘。詞簡而意明。其辦事精詳。可知矣。尋疏陳河工十九事。一修工葺柴多產海濱。舊有運料河。久淤。應加濬。便轉運。一清水會黃入海。關鍵全在六埧。六埧中。又以夏家橋爲最要。應俟水落時。堵塞。一高家堰容納七十二處山河之水。前河臣于成龍改六埧爲四滾水埧。地勢不遠。宜併爲三。仍鑿引河。并築順水堤。以衛田廬。一自武家墩至小黃河。舊有石堤。宜加高一古溝至六埧以下。俱係土堤。宜改用石。一清河縣運口至高郵州界首裏河。頻年黃水入運。致河身日高。宜加濬。一高郵寶應江都西岸埧。

多被水。閘。俟冬期加築。一高郵城南石埧五。改爲滾水埧。四。下  
開引河洩水。一歸仁堤石工。應補砌。一自運口至濱海兩岸堤。  
宜加倍高寬。一王家營引河。宜速挑濬。一新中河堤岸單薄。宜  
完固。一王家營減水埧。宜酌開十丈餘。以洩黃河漫水。一桃源  
縣南岸土堤。宜加倍高厚。一駱馬湖口對岸有竹絡埧。節宣黃  
湖大漲。今黃河身高。水灌駱馬湖口。匯入中河。致屢決。宜堵築  
以禦黃水。一王家營缺口。片堤單薄。宜培修以作正堤。一徐州  
自楊家樓至段家莊。宜築月城以作重門之障。一黃運堤岸。有  
傾圮興修者。有捐工興修者。勒限完築。一徐邳睢甯宿遷桃源  
清河山陽安東等處險工。宜支歲修銀。進歸防護。飭河官於伏

秋二汛晝夜防守疏入。詔下部速議行。又條奏區畫木石良  
厥。嚴定屬官考課章程九則。詔嘉其詳悉周備。命勒石河  
干。垂永遠。尋疏請於歸仁堤五堡建磯心石閘。於引河兩岸築  
束水堤。洩歸仁堤之水出黃河。可以衝刷河身。保護田廬。諭  
嘉其合理。又疏言武家墩至黃莊堤工。除撥銀四十萬兩外。尙  
短銀十八萬六千有奇。得旨允給。且曰。張鵬翮遇事精勤。實  
能宣力。朕不之信。將誰信耶。漕艘進口。舊在駱馬湖旁鑿渠名  
中河。後又改濬新河。淺陋不利。舟行公疏。請將舊中河築堤一  
道。改入新中河。則舊河上段與新河下段合爲一河。避黃河百  
八十里之險。於漕運大有益。優旨俞行。尋疏言臣遵聖擬

方畧先疏海口。水有歸路。黃水不出岸矣。旣挑芒稻河。引湖水入江。高寶等處水由地中行矣。再闢清河。開張福口。裴家場。引河。淮水有出路矣。加修高家堰。堵塞六埧。逼清水使歸故道。今清水大半入黃。少半入運。一水兩分。若有神助。請加河神封號。下所司知之。又疏請於韓家莊時家馬頭二處。開引河二。使黃流直下。以免衝激。從之。四十年春。疏請於張福口。裴家場中間。開大引河。一併力敵黃。若黃水大發。則閉裴家場口門。使清水由文華寺入運。河儻運河水大山陽一帶。由涇澗二河洩水。寶應一帶。由子嬰溝洩水。俱歸射陽湖。入海。高郵一帶。仍由山城南柏家墩二大埧洩水。江都一帶。由人字河。鳳凰橋等河洩水。入

江若遇黃淮並漲。清水由翟家堤。天然洩水。黃水由王家營。減水堤入鹽河。至平望河入海。若漕船過完。黃水大發。則閉攔黃壩。使不得倒灌。黃水不漲。則堵塞運河頭堤。令清水全入黃河。此古人設天妃閘之意也。疏入。

上嘉其得治河秘要。並諭閣臣曰。張鵬翮自到河工。在署之日。少每日乘馬巡視堤岸。不憚勞苦。朕深知之。四十一年六月。黃水大漲。桃源城西煙墩堤根甚危。公加築月堤護城。八月疏言。煙墩對岸河灘挺出。河心逼漕南行。請於邵家莊開引河。建草堤。分水勢。又顏家莊水勢逼射北岸。亦宜開引河。使水順流。上諭閣臣曰。此奏若下部議。必致遲延。卽照所請行。尋疏陳秋。



汎情形

上曰覽奏挑水埧築成黃河大溜直趨陶莊引河循北岸而行黃水從大通口暢出海口極其深通淮水從清口暢流敵黃絕無倒灌之患高家堰堤工完固運河之水由涇澗芒稻河人字河分洩河工大有望矣明年春

上南巡閱河賜御製河臣箴淮黃告成詩並賜公父煥船神清養志及松齡匾額二月山東饑命漕臣桑額截漕米二萬石交公選賢能官運至濟甯兗州等處平糶及賑濟尋動用倉穀二十八萬石十月

上以公殫心宣力不辭艱瘁又清潔自持特加太子太保四

十四年疏請增修徐州城外石堤。及山安黃河北岸堤工。并建  
月堤。均從之。先是三十六年夏。時家馬頭河決。至三十九年夏。  
堵築未就。公疏劾山東同知佟世祿冒帑誤工。應削職追償。  
詔公嚴訊。嗣世祿叩閭訴公枉縱。交江督阿山豫撫徐潮會鞫。  
尋奏時家馬頭承修銀。應令佟世祿償補。馬家港東埧被衝。張  
鵬翮雖經題報。未將承修官追償處聲明。應令鵬翮與疏防等  
官償補。未幾世祿復叩閭控愬。  
上遣戶部尚書徐潮等覆訊。係誣參。世祿復職。鵬翮巧飾供詞。  
失人臣禮。應罷職。淮安道王謙附會欺隱。應罰償擬杖徒。工部  
侍郎趙世芳議。公奏銷錢糧浮冒十三萬餘兩。應下法司治罪。

九卿如所議奏。

上曰。此案依前議。張鵬翮量甚窄。斷不引咎。河工錢糧原不限數。水大則所需者多。水小則所需者少。謂張鵬翮小有所取。亦未可知。謂以十三萬兩入已。必無之事也。河工恃乎用人。鵬翮所用之人多不勝任。故如此耳。趙世芳奏事不公。本發還。三月聖祖南巡。諭之曰。爾居官固好。卻爲王謙張弼所欺。任其恣意妄行。致人心不服。朕非不知爾能任勞苦。但聽信屬員。流於刻薄。凡大臣受朝廷委任。必須爲國爲民。事事皆有實濟。若徒飲食菲薄。自表廉潔。於國事何益耶。閏月。御舟渡黃河。閱九里岡。嘉公修理得法。賜御製詩扇。七月。淮黃並漲。古溝培埂。

清水溝韓家莊四溢坐防險不力。詔奪職畱任。公督河官盡力堵塞。於九月次第竣工。四十五年疏言。黃河萬里來源百川交灌。至清口與淮水合。總因來源多而去路少。致宣洩不及。若去路暢。則不至橫決。惟有遵旨開鮑家營引河。藉洩黃河及洪澤湖異漲。庶河堤及高家堰工均可保固。下部議行。初。公同江督阿山。漕督桑額。奏請開濶淮套。河屢請。

上親臨指示。四十六年二月。

聖祖閱視濶淮套。見地勢甚高。不能直達清河。所立標竿。多在民間墳墓上。面責公曰。奏請濶淮套開河。非地方官希圖射利。卽河員妄冀陞遷。至河工效力人員。無一方正者。何故畱之。

公奏臣誤聽小人罪實難辭下部議奪職阿山革任桑額降五級調用

上諭閣臣曰聞驗視漕淮套之時張鵬翮桑額皆謂不可開阿山強謂可開其令阿山革任張鵬翮奪宮保銜桑額降五級畱任四十七年疏報修秋汛平安優詔開復處分免應追銀兩內遷刑部尙書明年調戶部又明年命往江南謝獄五十年公以父逾八十請假省親得旨聞卿父精力尙健不必急請歸省明年冬調吏部命赴江南鞠賄中舉人程光奎吳泌等獄時江蘇巡撫張公伯行劾總督噶禮通同舞弊噶禮亦撫事劾伯行

上命公及總漕赫壽察審尋奏副考官趙晉實與程光奎吳泌賄通關節論罪如律噶禮劾伯行不能清理案件是實餘屬苛劾應降畱伯行劾噶禮索金全虛應革職贖徒

上切責公等掩飾和解命尙書穆和倫張廷樞覆審先是伯行疏劾布政使牟欽元匿通洋匪徒張令濤

上奪欽元職下總督赫壽察審赫壽奏欽元署中並無令濤其人五十二年冬

上命公及副憲阿錫鼎赴江南訊理尋以伯行誣參奏

上責其不能盡心令再詳審尋奏伯行誣陷良民妄生異議欽元應復職

上命伯行免罪來京。事詳張清恪公傳。是年丁父憂。時尙書富  
肅安督剿西匪。諭公暫畱辦部務。俟富肅安回京日奔喪。五  
十七年。典會試。明年復典會試。會汶水旱涸。運道梗。奉命勘  
視。請䟽濬坎河。雞爪諸泉。分注南旺濟運。而於彭口築堤。障沙  
水入微山湖。從之。又因河決武陟。往查勘。備陳引沁入運利害。  
謂地勢西北高而東南下。若引沁從高直下。而黃河躡其後。患  
且劇。山東運道有沙河馬場等湖。及諸山泉。本可濟運。祇因湖  
堤殘缺。民間竊種湖旁地。致諸泉壅塞。爲潛膠患。今已築堤蓄  
水。疏泉運道。自可通利。優旨俞行。不許稍有更改。六十一年。  
加太子太傅。雍正元年。授武英殿大學士。賜御書嘉謨偉量。

額六月。河決馬營口。銜命勸築三年。進明臣鄧鍾所著籌海重編。未幾薨。年七十有七。諭稱其秉性孤介。持躬廉潔。贈少保。於卹典定例外。再加祭一次。命致祭日。大小漢堂官齊集。賜全葬。諡文端。八年。詔入祀賢良祠。初。公嘗疏請。敕下史館。輯治河全書。

上卽以命公成。聖謨全書二十四卷。子懋誠由舉人仕至通政使。



徐健庵尙書事畧

崑山徐健庵尙書乾學八歲能文十三通五經爲顧公錫疇所賞康熙九年一甲三名進士以編修主壬子順天鄉試拔韓公莢於遺卷中遂大魁天下文體爲一變坐取副榜不及漢軍鎬級歸十四年復原官擢贊善丁內艱葬祭悉遵古禮著讀禮通考百二十卷服除以贊善充明史總裁官異數也累遷侍講學士晉詹事二十四年

御試翰詹諸臣公冠其偶諭獎公暨侍讀韓莢編修孫岳頒侍講歸允肅編修喬萊學問優長文章古雅陞賞有差公尋直南書房擢內閣學士充會典一統志副總裁教習庶吉士會郎

中色楞額請禁用明代舊錢。尙書科爾坤、余國柱等議如所請。公言不可。因考自漢至明故事爲議以獻。

上是公言。事遂寢。二十五年。諭吏部學士徐乾學、張英、宜畱。辦文章之事。勿開列巡撫。尋授禮部侍郎。充經筵講官。公弟元。文字立齋。官總憲時。疏言。滿洲漢軍官宜一體守制。二十有七月。其外官丁憂。不許候代治事。又申律文。居喪作樂。筵宴嫁娶之禁。及公貳禮部。謂禮以教孝爲本。百日釋服。及舉殯演劇。爲非禮之尤。滿洲京朝官頗沿舊習。請嚴禁。蓋與立齋大指互相發也。又請停歲貢廷試。免遠涉。時公被命纂修鑑古輯覽。及古文淵鑑。二十六年。擢左都御史。公語人曰。我何敢遠希古人。

近不愧吾弟足矣。乃疏劾江西巡撫安世鼎罷之。勸諸御史風聞言事。遇會議會推與尙書科爾坤佛倫等多不合。其會議河工屯田也。公與尙書張玉書並言屯田所占民間地畝宜還舊業。科爾坤佛倫不從。御史陸祖修因劾科爾坤佛倫等偏袒河臣靳輔。不顧公議。御史郭琇亦劾靳輔與屯累民。詔罷靳輔。任於是在廷多仄目公矣。二十七年總裁會試。卽闈中授刑部尙書。時立齋已鐫級去官。至是仍起左都御史。兄弟迭相代當世榮之。公出甫就職而張汧之事起。先是

上命侍郎色楞額往鞫上荆南道祖澤深劾。欵并察湖廣巡撫張汧有無穢蹟。色楞額悉爲開釋。又不劾。幼張汧。御史陳紫芝

旋劾汧貪黷。命副憲開音布往會直隸巡撫于成龍山西巡

撫馬齊復訊。既鞠實張汧祖澤深婪索事。復得澤深交結大學士余國柱爲屬色楞額徇庇及汧未被劾時遣人赴京行賄狀下法司核擬。當是時國柱經御史郭琇劾其與大學士明珠尙書佛倫等營私附和罪已罷歸。法司請檄追質問并詰汧行賄何人。汧以不能悉數對。既而誣指公旋復吐實。

上命免國柱質問且諭就已鞠實者定擬勿株連。於是汧澤深及色楞額並論罪如律。公得白尋上疏乞放歸。

上不聽。公去以疏辭懇切許解部務仍領各館總裁。三日一直內廷。初甲子秋公季子樹屏與立齋長子樹聲同舉順天鄉試。

上以是科所取南皿卷。皆江浙人。而湖廣江西福建無與者。下九卿磨勘。忌者遂坐樹屏等文體不正。議當斥。且送法司質訊。上不聽。僅落二子舉人。而公兄弟任如故。至是考選科道。公子樹穀。樹俱在選中。立齋在閣。循故事乞迴避。

上不允。特用樹穀爲御史。而副都御史許三禮遂緣是劾公。且謂公潛住京師。部議坐三禮誣。鑄級三禮益恚。復訐公贓罪。上仍嚴飭之。公再疏乞骸骨。

上允所請。命以書局自隨。諭曰。一統志記載須詳核。宋元通鑑原書牴牾舛錯。卿學博才優。其殫心參訂。纂輯進覽。所奏俱依議行。時已仲冬。

上命且過冬行無觸寒爲也二十九年春抵家命樹穀齋疏謝  
上命張尙書英傳旨問樹穀而父安否且傳齋奏緣僅至午  
門問途中起居狀

上蓋怒公不置也公傲居洞庭東山而江督傅鵬塔劾公兄弟  
罪入子姪名幾盡

上寢其疏不問又一年而有山東濰縣令之事濰令朱敦厚者  
故明死事巡撫之馮子也以加火耗爲巡撫佛倫所劾論死并  
劾公會致書前任巡撫錢珏徇庇敦厚又以行賄狀掠訊敦厚  
冀傾公不承乃已然公與珏均坐是落職自是而媒孽公者不  
已嘉定知縣聞在上坐私派得罪閤時二年矣令忽承會遺公

子樹敏金而卻之遲復坐公子罪論絞欲重危公會

聖祖詔諭天下以內外臣工私怨相尋牽連報復逮於子弟殊非朝廷保全體恤之意諸毆公者乃稍稍解而樹敏得贖罪時書局撤復奉命續進所定草公避居嘉善已又栖息郡西華山之鳳村

上久益思公有旨召用而公不及聞新命矣以康熙三十

三年四月薨遺疏入復原官年六十有四公自爲翰林以文學受知在南書房凡有叩問應如響既轉禮部

上特命凡內閣制誥文章仍令管理掌都察院時行幄適有表啟不稱旨乃屬爲之公途次伏地草奏

上善之問誰爲是者。眾以公對。時已有楚獄矣。

上曰。文字乃仍須徐某撰耶。

上嘗出御製文集四十卷。命公編校。儒臣尤以爲榮。嘗得

嘔噦疾。

上曰。此疾惟虎胃可療。如不痊。朕何惜一虎。在經筵。御賜博

學明辨四大字及歸。御書光燄萬文字以寵其行。公他所建

白甚眾。議論棘棘。不阿。不喜爲調停之說。在禮部時。山西巡撫

某以溺職逮。廷臣會議有言其居官安靜者。

上詰責。則誘之陳公廷敬。公獨抗言。無是語。眾皆愕。怡公出曰。

我上不敢欺。朝廷下不敢負朋友也。公負海內重望。一時者。



宿山林遺老皆輕千里從公邸舍客滿僦別院居之如檢討陳君維崧倪君燦吳君任臣及黃徵士虞稷吳孝廉兆騫死皆公所殯葬公愛才若渴絕不爲私然交遊太廣其家人門下客不無緣之爲奸利而士之失職不平者復鼓唇舌其閒蜚語傳播致屢入彈章賴

天子明聖得保全公歸時送公者雖三館之吏皆哭失聲曰公去誰活我者讀書過目不忘能五官並用嘗與姜編修宸英觀古碑碑甚高公令人掖以上橫閱之已又橫閱其中下段遂能盡舉其詞編修大驚以爲絕才無對也所藏書極富

聖祖詔求遺書公疏進十有二部溫旨畱覽今傳是樓書目

猶行世。公嘗言甯人負我。毋我負人。又曰。做官時少。做人時多。做人時少。做鬼時多。故不特文學爲時山斗。而風節尤至老不衰云。

徐文定公事畧

徐元夢公字善長一字蝶園滿洲正白旗人姓舒穆祿氏舒與徐滿音畧同而字義亦近故天下稱蝶園徐公公年十九成康熙十二年進士選庶吉士時明珠索額圖枋政以權利相傾各樹羽翼中朝士大夫非陰自託各有主張宦不得遂當是時顯與爲敵者惟湯文正魏敏果柴立中央而無所依附者韓文懿李文貞外可指數也索額圖生而盛貴性倨肆有不附已者常面折顯斥之明珠則與其黨深相結異已者陰謀陷之而務謙和輕財好施以招徠新進及海內知名士公爲庶常李文貞掌翰林院事嘗薦公及德格勒公賢

聖祖時召見講論經義。德公嘗扈從巡行。明氏使人奉萬金爲裝。固辭裝已治。無所用之。公散館列二等。例以科道用。索額圖惡公不附已。奏改戶部主事。用此明氏尤欲致公公爲童子試京兆。與明氏子成德名相次成進士。同榜。屢相招皆不就。爲部屬時以公事見珠。必徧贊於廣眾中。二十二年由主事遷中允。尋遷侍講。

上一日詢公之爲人。珠以誠實對。選講官列薦名。先於學士公終不一至其門。會天久不雨。

上命德公筮卦。遇夬。問其占。進曰。澤上於天。將降矣。而卦義五陽決一陰。小人居鼎鉉。故天屯其膏。決去之。卽雨。

上愕然曰。安有是德。遂以明珠對時。索氏已挫於珠矣。始聖祖親政。方冲齡。索首建謀。黜輔臣。專橫者百僚。懾伏而珠善結左右。親近爲腹心。其黨徧布中外。雖有賢者。慎自守。不求親媚而已。終莫敢齟齬也。惟康熙十有七年。京師地連震。

上晝夜坐武帳中。魏果敏公直入奏。天變若此。乃二相植黨。市權引用。僉壬以剝烝黎之應。繼之者則德公用此名震天下。而珠亦駭遽不自安。自是以後。蜚語時上。聞謂公父爲兩江總督。麻勒吉僚屬。黷貨不貲。公與德公比議朝政。適靈臺郎董漢臣上書言時事。多所指斥。下內閣九卿議。大學士勒德洪公。尙書達哈塔公。及湯公。謂書中豫教太子。崇節儉。宜施行。而眾陰撓。

之駁議至再三以湯公尤殊所深嫉也由是眾口喧稱湯公不欲

主親教太子覲爲師傅公與德公亦然先是

上嘗詢公所學視德格勒孰優公自陳遠不逮也至是復舉廷臣某與公相衡而德公奏公遠過之請

上面試忌者遂言公及德公互相標榜湯公實陰主焉越日

召試尙書陳公廷敬以下文臣十二人於乾清宮公與德公方屬草有旨責讓德公遂於試文後申辨公詩亦未成

上命同試諸臣校勘眾相視無言而湯公獨以公文爲是又命廷臣公閣湯公執前言且謂德公品學素優不宜以文字黜

是日翰林院奏劾德公鑄五級畱任時湯公爲東宮講官  
上遂命爲師而公亦爲皇子師珠復使所親謂公此非福也  
惟歸誠於執政或少安公不答是秋

上御瀛臺教諸皇子射公不能挽強

上怒以蜚語詰責公奏辯

上震怒命扑責被重傷命籍其家父母皆發黑龍江安置然  
上意終憐公其夜命醫二人治其創翼日復召詣皇子  
書堂時大雨裹瘡至宮門跪泥中見御前侍衛卽號泣求轉  
奏臣奉職無狀罪應死臣父廉謹當官數十年籍產不及五百  
金望

聖主察之。且臣父母皆老病。臣年正壯。乞代父謫戍。尙能勝甲兵。效命。眾皆掩耳去之。有關係者。最後至斥公而入。盡以公言奏。

上立赦公。父母別已。檻車就道矣。及諸途觀者。夾路皆感泣。遂復公官。仍侍。皇子時。二十六年四月也。冬杪。翰林院掌院學士庫呼納。劾奏德公私林起居注有。旨問公知否。會。

孝昭文皇后升遐。各以尉二人。甲士二十人。監守於私室。次年二月。下獄。始至。卽以三木訊公。旁逮也。撈掠數十脛。大如股。禁親屬家僕。毋通席地。臥求水漿。不得。獄卒刻時。以至提木索而搖之。毒痛自知。必死。適侍衛某入視族姻。公辨其聲。大呼曰。一



上命問我非欲殺我也。其人就視出，謂典獄者曰：「此人死，我必入告。」由是家人得入進食飲。而湯公亦以議董漢臣事得咎矣。起居注故事，數易稿，然後登籍。德公所刪易，乃未登籍之稿。公晨夕侍皇子守官分局，無由與知，而獄辭上。當德公斬立決。公監候秋後絞。特旨改德公監候，公免死，鞭一百，荷校三月。妻子入辛者庫。逾年，公主出降科爾沁。公一子一女主旗務者，遂以公女媵。時德公遇赦出獄，歸本旗，遂使盡室以從。公素不善騎，公主疾或請於

上遣公往視相去千餘里。刻日返命。從者二人一道斃。公入反命，出昏跽兼旬不能起。蓋自郭公秀劾奏後，珠雖落職家居而

所引用已盡列要津每承進觀色以求壓其忿好又善事貴勢與相應如影響也珠既老其黨漸散安溪李公日見親信

上亦久而察公之忠誠三十二年命入上書房課皇子讀書尋授內務府員外郎四十一年充順天鄉試副考官越四年再奪職五十一年起內閣侍讀學士充會試副考官五十二年遷內閣學士兼禮部侍郎特旨出辛者庫歸原旗五十三年授浙江巡撫賜御製詩文集及鞍馬以行明年疏陳杭紹台金衢嚴處七郡災請截漕米二十萬石平糶并緩征以紓民力允之五十六年入爲左都御史兼掌翰林院事先是都御史員缺

上諭廷推學問。好。不。畏。人。如。徐。元。夢。者。隨。有。是。命。會。

上以科場中積弊未除。凡主考及同考官。聲名之劣者。諭令

糾劾示警。乃劾罷編修儲在文。徐用錫。張起麟。沈宗敬。及任滿

學政王雲錦。林之睿。萬經。車鼎晉。鄭晃等。五十七年。晉工部尚

書。仍兼掌院學士。教習庶吉士。自乙酉冬。李公入相。

上萬幾之暇時。召人獨對。同列無與班者。李公南還。公繼之。

恩遇幾與比。並六十年冬。駕幸南苑。公未及從。

上曰。徐元夢乃同學舊翰林。康熙十六年以前進士。止此一人。

矣。御製詩一章。并序。稱爲同學老友。副以食品。遣使於夜分。

呼正陽門入。卽家賜之時。太夫人尙康。彊屢朝。

皇太后於慈甯宮恩禮備至而德公已老死徼外矣公每言及未嘗不慘悽而顏變也

世宗卽位以舊學故特重公命入上書房課皇子讀書雍

正元年五月署理內閣大學士兼署左都御史充明史總裁十

月調戶部尙書仍辦大學士事賜御製詩四年坐繙譯訛誤

落職在內閣學士裏行行走八年坐撫浙時失察呂畱良私書

應革任命同繙譯中書行走十三年充繙譯鄉試副考官是

年八月

高宗御極命南書房行走尋授內閣學士遷禮部侍郎充

實錄館總裁仍命入上書房授書皇子明年八月以老病

乞休。優詔許解侍郎任。加尚書銜。照現任食俸。仍在史館內廷行走。乾隆四年。加太子少保。六年秋。邁疾。遣太醫診視。賜復藥。十一月。疾革。

上命皇長子往視。及薨。

上痛悼。命和親王及皇長子往奠。賜銀二千兩治喪。特諭稱公人品端方。學問優裕。踐履篤實。言行相符。歷事

三朝。小心謹慎。數十年如一日。可謂完人。贈太傅。入祀京師賢良祠。賜祭葬如典禮。諡文定。壽八十有七。公撫浙時。清約若寒素。割俸葺歙文書院。書院故號萬松。以公請。

上賜榜。易今名。買田聚書。以惠學者。高安朱公踵行之。兩浙人

文之盛自此始。公知名早。仕宦垂六十餘年。性剛介。負氣不爲威懷。中年後。精研理學。言貌溫溫。若惟恐傷人者。而中持黑白。卒無所依違。與人敬以和。貴賤老少如一。長翰林數年。物望所歸。鮮不薦達。老而篤學。與方望溪侍郎共事。蒙養齋暇。卽就望溪考問經義。時江浦劉无垢。泰州陳次園。常在側。交口責望溪曰。有是哉。子之野也。徐公中朝耆德。且爲諸王師。子抗顏如師。誨之如弟子。可乎。望溪曰。吾以忠心答公之實心耳。子視公。遂出孔道。輔下乎。諸王侍衛中。有年逾三十始讀大學。而請業望溪者。講至秦誓。作而曰。所謂一个臣。吾視徐公。良然。嗚呼。公之誠於中而動於物者。可想見矣。孫舒赫德。官至大學士。自有傳。

格文清公事畧

公諱格爾古德字宜亭。姓鈕祜祿氏。滿洲順聖所人。初由筆帖式爲副理事官。康熙三年。隨定西將軍圖海征湖廣。茅麓山流賊。凱還。遷宏文院侍讀。尋遷翰林院侍讀學士。充日講起居注官。十三年。隨安親王岳樂征逆藩吳三桂。自江西進湖南。十七年。僞將軍林興珠率眾降。安親王軍前。公自長沙馳報。並奏聞。與珠所陳因敵策。請分岳州水師爲二。一泊君山。以斷常德之道。一泊香爐峽。隔山以斷長沙衡州之道。則賊不戰自潰。

聖祖密諭駐軍岳州之貝勒大臣。俾核議施行。十九年。隨安親王還京。擢詹事。尋有詔。議敘勤勞。奉職詣講官。加公一級。二

十年遷內閣學士。明年授直隸巡撫。諭曰：「旗下莊頭與民雜處，倚聲勢，每爲民害。爾其嚴察懲勅，毋姑息。」金世德于成龍爲巡撫，廉潔有聲，爾繼其後，得名甚難。然苟急於求名，反致債事。其慎旃。二十二年，疏言：「自鬻投旗之人，或有作奸犯科，冀逃法網者。或有游手好閒，規避差謠者。本主聽其仍居本籍，放債牟利，則諱旗而稱民。遇官長訪問，窩逃構訟等事，又舍民而稱旗。甚或招搖鄉里，魚肉小民。地方吏不敢問，應責令本主止畱務農，人戶於屯莊餘俱收回服役。嚴定縱徇處分。」得旨：「下所司飭禁。」並特諭戶部：「凡鬻身之人，或曾經犯罪，冀投旗倖免者，與知情之本主俱從重治罪。」二十三年，疏言：「順天永平、保定、河



間等府平田園作旗產者向以別州縣之地撥換仍聽彼處民人佃種令業戶收租供賦遇佃租不償則額賦無出其他地所屬州縣因與錢糧考成無涉不爲催租致受撥之地多有積逋官民俱累請自後令佃地所屬州縣代爲征解仍按未完分數與奏銷一例處分疏下部議行先是保定連歲歉收米粟騰貴公請截畱山東漕米撥給駐防兵格於議公復疏言駐防兵米不下萬石若就近採買民間益苦值昂或遠購隣境運費不貲仍請截畱便特旨允行時大學士明珠佐領下人戶指園民間塚地墾種有訴於戶部者牒巡撫察勘宛平知縣王養濂以無礙塚塋飾辯公劾養濂引園塚地厲民得旨下部議處並

諭曰。民間田地。久經降旨。永停圈占。止以部存地畝。分撥新戶。口何得借端擾民。嗣後有似此者。必重治其罪。六月。疏薦廉能吏。并陘道李基和。靈壽令陸隴其。盧龍令衛立鼎。均得旨下。部陞敕。尋以疾請解任。溫旨慰留。遣太醫診治。會詔九卿等公舉清廉官。首以公列奏。

上曰。格爾古德。居官素優。近聞患病羸弱。深軫朕懷。七月。薨於位。年四十有四。遣內大臣侍衛。於襯至日。往奠茶酒。部臣以公會降一級。任巡撫未滿三年。應減半予祭葬銀。

上曰。格爾古德。廉潔自持。勤勞素著。其復所降級。從優再議。尋賜祭葬如典禮。諡文清。公清介。絕塵衣布。素日食惟菜菔。卻歲

餽萬計。纖毫不以自污。直隸旗民錯處。遇事多爲權要所持。康熙初。鰲拜圍地議起。督撫朱昌祚、王登聯等均以守正被冤殺。自是人以爲戒。無敢訟言其非者。至奸民竄入旗下。尋仇傾陷。尤狡桀。公執法嚴懲。不少貸。時有鐵面之稱。識陸清獻於縣令中。待之以國士。

上嘗諭責漕運總督碩幹。居官無善狀。碩幹奏曰：「臣爲眾所忌。故聲譽無從致。」

上曰：「格爾古德爲巡撫。歿後人猶思慕稱頌之。居官苟善。豈有不致聲譽者乎？其爲。」

上所推重如此。二十六年。祀直隸名宦祠。